




氏族典第二百十五卷

何姓部列傳三

金 何定

按金史宣宗本紀貞祐三年九月癸酉賜何定爲必蘭氏遷一官

何瑛

按元史何榮祖傳榮祖父瑛金貞祐間試文法入優等補吏後授明威將軍守鉅鹿尹權軍器監主事

元 何伯祥

按元史何伯祥傳伯祥易州易縣人幼從軍于金從張柔來歸太祖定河朔伯祥攻西山諸寨悉平之後攻汴梁拔洛陽圍歸德破蔡州論功居多授易州等處軍民總管從察罕伐宋大破之賜金二百兩世祖南伐伯祥參預軍事多所獻納卒于軍贈儀同三司太保上柱國追封易國公諡武昌

何實

按元史何實傳實字誠卿其先北京人曾祖搏霄雄於資好施與鄉里以善人稱祖鼎敬父道忠仕金爲北京留守實少孤氣節不凡家人常入臥內見一青蛇蜿蜒衣被中駭而視之乃實也及長通諸國譯語驍勇善騎射倜儻不羈遠近之民慕其雄略咸歸心焉丙子來歸木華黎引見太祖獻軍民之數帝大悅命從木華黎選充前鋒以功爲帳前軍馬都彈壓遷兵馬都鎮撫從取大同鴈門石隰等州悉平之引兵掠太原平陽河中京兆諸城所向款附木華黎錄其功表實爲元帥左監軍木華黎卒子孛魯嗣命戍于邢多著善政甲申孛魯征西夏以實分兵攻汴陳蔡唐鄧許鈞睢鄭毫潁所至有功丁亥賜金虎符便宜行元帥府事丁巳卒于博子崇禮授應奉翰林文字從仕郎同知制誥兼國史院編修官

何瑋

按元史何伯祥傳伯祥子瑋始襲父職知易州兄行軍千戶卒瑋復襲之鎮亳州從圍襄樊宋將夏貴率舟師來救瑋率衆死戰貴敗走至元十一年丞相伯顏受命伐宋辟瑋爲帳前都鎮撫宋丞相賈似道率舟師拒于丁家洲瑋將勇敢士出戰奪舟千餘艘似道遁去授武德將軍管軍總管宋既

平進懷遠大將軍太平路軍民達魯花赤俄陞昭勇大將軍行戶部尙書兩淮都轉運使十八年擢參議中書省事二十年擢爲江浙按察使二十二年改大名路總管二十八年遷湖南宣慰使三十一年拜中書叅知政事大德四年授侍御史以母病辭七年授御史中丞以疾去位武宗卽位于上都授太子副詹事遣使促使就職復遙授平章政事商議中書省事至大元年遷太子詹事兼衛率使俄拜中書左丞擢河南行省平章政事提調屯田事三年改河南行尙書省平章政事卒贈太傅開府儀同三司上柱國追封梁國公諡文正

何榮祖

按元史何榮祖傳榮祖字繼先其先太原人金亡徙家廣平榮祖狀貌魁偉額有赤文如雙樹何氏世業吏榮祖尤所通習遂以吏累遷中書省掾擢御史臺都事始折節讀書日記數千言阿合馬奏爲左右司都事出爲山東按察使遷河南按察使除雲南行省叅知政事以母老辭又拜御史中丞復出爲山東東西道按察使召入爲尙書叅知政事時桑哥專政榮祖條中外有官規程欲矯時敝桑哥抑不爲通榮祖旣與之異議乃以病告特授集賢大學士未幾起爲尙書右丞桑哥敗改中書

右丞以老疾乞解機務詔免署事尋拜昭文館大學士預中書省事又加平章政事以水旱請罷不允適子祕書少監惠沒遂歸廣平卒年七十九贈光祿大夫大司徒柱國追封趙國公諡文憲

何道柔

按新城縣志道柔景州人號全陽子年十五遇異人教以師事七真不憚千里尋師海上古宗太古真人求性命之學與長生長春玉陽諸真相印証庵御木洞查山周遊於寧海蓬萊雲光望仙諸處靈異種種如崑虎衛門山神侍坐自定死期于三十年前知發棺于數百年後諸如此類未易殫述從遊二百餘人享年七十有三於元大德丙午四月二十一日委蛻焉

何太深

按新城縣志太深全陽弟子元大德甲寅以普天大醺賜號清真大師被素紫服

何天駿

按蒲圻縣志天駿字國正其先自宋季徙蒲卜居于邑西厥考號毅齋天駿克承考志篤嗜經史游情翰墨博洽不羣皇慶中授富川學錄轉湘鄉學正子姓世居洪山稱邑望族

何維

按薄圻縣志維延祐元年中鄉試時常德孫以忠沅州李壽豐陵李明孫才名相埒而維尤爲奇特
逸氣煥發莫之與京是科梓行求賢詔一篇摘辭爾雅有兩漢詔令之風

何槐孫

按蒲圻縣志槐孫字德孚號龍岡湘鄉學正天駿子幼穎慧駿發日記數千言泰定三年舉鄉貢明
年中書堂會試列高第天曆二年授江西宜黃縣尹吏事精敏人不敢欺再推德安雲夢政聲益茂
至正二年選慶元路總管府推官除姦禁蔬雪冤理滯闔郡畏服陳廷訓爲撰政績碑所著有善政
指南書及碑碣諸文行于世

何中

按元史何中傳中字太虛撫之樂安人少穎拔以古學自任家有藏書萬卷手自校讎其學弘深該
博廣平程鉅夫清河元明善柳城姚燧東平王構同郡吳澄揭傒斯皆推服之至順二年江西行省
平章全岳柱聘爲龍興郡學師明年六月以疾卒

何從義

按元史何從義傳從義延安洛川人祖良祖母李氏偕亡從義廬於墓側旦夕哀慕不脫經帶不食菜果惟啖蔬食而已事父世榮母王氏孝養尤至伯祖溫伯祖母郝氏叔祖恭叔祖母賀氏叔祖讓叔祖母姜氏叔父珍叔母光氏皆無子比其亡也從義咸爲治葬築高墳祭奠以禮時人義之

何失

按萬姓統譜失昌平人負才氣能詩文至正間名公交薦以親老不就揭傒斯嘗推重云心事巢由侶文章陶阮間虞集見其所作嘆曰當寶而傳之使後之作者亦知世有斯人

何廷蘭

按萬姓統譜廷蘭鳳翔人仕元薦登臺省三十餘年納忠陳善秉節不阿

明何應龍

按萬姓統譜應龍南陵人幼涉獵經史膂力絕人元末起義兵後以奇功授珠虎符爲民兵萬戶歸附太祖乃襲其官從徐達北定中原還留宿衛後征西卒于途子執中廕襲次子時中聚族同居九

世不分

何世隆

按萬姓統譜世隆沉勇而決當元季羣雄割據世隆糾義兵守滁城以信義爲衆嚮慕歲甲午秋七月太祖高皇帝駐兵滁陽世隆率所部歸附授以萬戶俾守滁城歲丙申陞右副都元帥時州境當兵革之後民物凋斃世隆盡心撫綏衆賴以安歲壬寅五月以病終于官

何顯周

按萬姓統譜顯周內黃人洪武初爲四輔官賜坐講論治道命工圖其像賜待漏院記及誥命以旌之

何眞

按明外史何眞傳眞字邦佐東莞人少英偉好書劍元至正初爲河源縣務副使轉淡水場官棄官養母海盜邵宗愚反元帥府選眞領前鋒討之爲同事所忌辭歸聚衆保鄉里十四年縣人王成陳仲玉作亂眞赴告元帥府帥受賂反捕眞逃居坭岡舉兵攻成不克久之惠州人王仲剛與合兵遂

有循惠二州乃授惠陽路同知擢廣東分省叅政進江西福建行省右丞仍治廣贛州熊天瑞欲圖眞眞擊走之廣人賴以完累遣使由海道貢方物於朝進資德大夫行省左丞洪武元年太祖命廖永忠取廣東永忠以書諭眞遣都事劉克佐詣軍門奉表以降永忠聞於朝擢眞江西行省參知政事頗著聲望尤喜儒術已轉山東叅政尋命遷廣東收集舊卒事竣仍蒞山東久之致仕征雲南命眞偕其子兵馬指揮貴往規畫軍餉遷山西右布政使再與貴勾軍廣東擢貴鎮南衛指揮僉事尋命眞爲浙江布政使改湖廣復致仕封東莞伯卒子榮嗣與弟貴及尙寶司丞宏皆坐藍黨死眞弟迪疑禍及遂作亂被獲伏誅福王時贈眞東莞侯諡恭靖

何文輝

按明外史何文輝傳文輝字德明滁人太祖下滁州得文輝年始十四撫爲己子冒國姓及長授總制尋以天監翼元帥守寧國久之擢江西行省參政進行省左丞復姓何氏以征南副將軍由江西取福建度杉關入光澤徇邵武建陽直趨建寧師入城秋毫無所犯汀泉諸州縣聞之相次歸附會車駕幸河南召文輝扈從至汴梁命爲河南衛指揮使從取陝西所至皆有功留守潼關洪武三年

授大都督府都督僉事子世襲指揮使復以叅將平蜀命留守成都號令明肅軍民德之遷大都督府同知踰三年移鎮北平又移鴈門以疾召還卒於家子環成都護衛指揮使征迤北陣沒

何福

按明外史何福傳福鳳陽人洪武初累戰功爲金吾後衛指揮同知從征雲南有功擢都督僉事二十四年拜平羌將軍討越州叛蠻阿資破降之三十六年拜征鹵左將軍副西平侯討平緬叛酋刁幹孟幹孟懼乞降已而平西侯卒幹孟竟不降復拜福征鹵將軍往討擒幹孟以歸降其衆七萬建文元年還京師進都督同知進左都督與盛庸平安會兵禦燕師戰淮南北不利奔還成祖卽位以福宿將知兵命充總兵官鎮寧夏節制山陝河南諸軍永樂四年備靈州移鎮甘肅封爲寧遠侯八年帝北征召福從出塞初帝以福有才略寵任踰諸將有請輒聽福亦引嫌有事未嘗專決帝以此益重福比爲通侯志寔驕軍中數違節度羣臣有言其罪者帝猶曲意容之而福怏怏有怨言及師還都御史陳瑛劾福福懼自縊死爵除

何德

按河南通志德光州人元季江淮兵起德委身來歸從定江左諸郡屢立戰功由驍騎衛千戶陞虎賁衛指揮僉事尋陞指揮同知率兵守遼東累遷大都督僉事明洪武十三年改立五軍遂爲左軍都督僉事十七年扈從北征還卒追封廬江侯諡莊毅

何禮

按畿輔通志禮清苑人洪武間以才行異等舉用歷任勤能物論推重官至兵部尙書

何源

按吳江縣志源初名德源字幼澄同里人洪武乙亥充貢明年舉於鄉會試中乙榜第一授德州學正以薦擢知本州爲政廉明州人號曰賽包家母喪歸起爲梧州知州毀淫祠修學校尋以詿誤謫交趾鎮守英國公張輔知其賢舉署交州府學事交人不知學源始教之學召除吏部考功員外郎出爲鄭府右長史尋改吏部文選郎中人不欲干以私正統初擢江西布政使三年入覲上憫其老予致仕歸自號東吳遺老

何銘

按江陰縣志銘福州右衛指揮僉事貴之孫貴州安壯後所百戶澄之子洪武二十七年襲除湖廣蘄州前所百戶建文二年改沔陽前所百戶永樂四年起調後所宣德元年征交趾陣亡

何道旻

按泰寧縣志道旻字伯清洪武二十八年拜大理評事遷監察御史彈劾不避權倖讞獄多所平反命持節照刷四川文卷奏乞不拘欽限及自選監生爲佐因著爲例齊邸謀叛特命道旻回奏稱旨陞江西按察副使贛賊陳平爲亂討戮渠魁辨釋誣指移湖廣宿弊頓革復建言時事得失利害以嚴憚招忌坐事免官太宗繼統復起僉廣東按察司事憲司羅某貪墨首奏黜之旻而督浙江工匠營造北京凡六寒暑病者藥死者葬宣宗卽位務選老成任郡守陞知永州府猾吏不能欺民以病請老歸自筮仕四十年事四朝歷中外所至皆著能績

何廣

按萬姓統譜廣上海人洪武中舉明經任知縣陞江西僉事再陞湖廣叅議在邑則有惠政稱循吏在僉憲有激揚名在藩垣得方岳體嘗著律解辨疑

何初

按萬姓統譜初常山人博通經史洪武中知仁化縣遷巴東教諭召修書書成調開化造就人才士風爲之益振

何敏中

按萬姓統譜敏中洪武中以才行卓異任祁門知縣上書言時政得失朝廷嘉之遣行人賜以樽酒陞徽州府知府後轉嘉興府所至有政聲

何穎

按萬姓統譜穎武陵人洪武庚辰進士擢四川峨嵋令有善政邑人失牛吏捕得之穎疑其冤默禱于城隍果得真盜累官江西按察司僉事

何懷輝

按萬姓統譜懷輝桂陽人以刑律精通保任大理評事遷都督府經歷勤能益著陞通政司叅議時論偉之

何洲

按萬姓統譜洲海州人不知仕何官與宋和郭節友善素以忠義相助靖難後遂相約棄官爲筮人客死異域竟莫識其姓名王詔合和節洲而爲之贊曰箕子陳範嚴氏隱卜義有從否道有宜告烈烈英賢寥寥冥鵠

何澄

按江陰縣志澄字彥澤永樂癸未舉于鄉同知蘄州遷刑部郎中折獄明允改文選持衡甚平因言事忤旨謫武當洪熙改元詔歸宣德間以薦擢袁州牧嘗毀淫祠正統中乞休所居植竹數竿引以二鶴因號竹鶴老人

何楚英

按萬姓統譜楚英攸縣人登永樂己丑進士第拜監察御史克效勤勞特陞陝西副使歷雲南左布政使累賜敕褒之至今黔人猶稱其善政

何忠

按荊州府志忠字廷陳江陵人永樂壬辰進士拜監察御史出知正平州專上德禮交趾叛忠在圍中藩臬大臣謂忠有才智膽略使告於朝乞師忠縋城出被執賊以甘言誘忠大罵不屈死詔旌其門贈南寧府同知諡忠節公

何文淵

按明外史何喬新傳喬新父文淵永樂十六年進士授御史歷按山東四川宣德五年用顧佐薦奉勅知温州府居六年治最以胡濙薦擢刑部右侍郎出督兩淮鹽課正統三年以疾乞歸景帝卽位起吏部左侍郎尋進尙書東宮建加太子太保災異見給事中林聰等劾文淵儉邪乃命致仕英宗復位削其加官或傳朝命逮捕遂自經死

何遷

按安陸縣志遷字益之號吉陽永樂中以武功調隸辛丑登進士第授戶部主事改吏部出判九江陞太常卿巡撫江西歷官刑部右侍郎所著吉陽集數十卷友問四卷

何自學

按萬姓統譜自學字思學金谿人宣德元年進士授刑部主事陞廣西僉事移山西丁內艱英廟幸大同朝廷以自學才器爲言詔起復力辭而止服闋陞陝西按察使到官見繫囚衆審閱不旬日囹圄爲之一空後死於土木之難

何宜

按萬姓統譜宜字行義福清人登正統戊辰進士第拜戶部主事遷兵部職方司郎中成化初疆圉頗多事邊報沓至皆職方司主之宜從容區畫上聞裁處多稱意旨及其施行人皆以爲得宜一時卿佐極加器重凡有大議皆倚以諮決遷浙江布政司叅政終江西左布政使所至以廉謹見稱

何觀

按明外史劉球傳何觀以善書爲中書舍人景泰二年劾尙書王直輩正統中阿附權奸今不宜在左右中貴見疏中權奸語以爲侵已激帝怒下科道參議吏科毛玉主奏稿力詆觀會御史疏上中亦有觀者滿不遷私憾吏部語蓋侍郎項文耀屬之也帝怒下觀詔獄杖之謫九溪衛經歷

何喬新

按明外史何喬新傳喬新字廷秀江西廣昌人父文淵喬新登景泰五年進士官南京禮部主事奔喪歸里里人故侍郎揭稽嘗受業文淵而與喬新兄弟不協奏文淵死實諸子迫之又逼嫁父所愛妾喬新亦許稽皆被徵比對簿父妾斷指爲諸郎訟冤獄得少解帝亦以事經赦釋不問已復丁母憂服除改刑部主事歷郎中成化四年遷福建副使久之遷河南按察使招撫流民附籍者六萬餘戶遷湖廣右布政使十六年擢右副都御史巡撫山西召拜刑部右侍郎孝宗嗣位萬安劉吉等忌喬新剛正出爲南京刑部尙書旣而刑部尙書杜銘罷羣望屬喬新而吉代安爲首輔終忌之久不補弘治改元用王恕薦始召喬新代銘二年夏京城大水喬新慮刑獄失平條上律文當更議者數事吉悉格不行郎中魏紳者喬新素重之薦爲大理丞而御史鄒魯覲遷以喬新薦紳恨之會喬新外家與鄉人訟魯卽誣喬新受賄曲庇吉取中旨下諸人詔獄喬新乃拜疏乞歸頃之窮治無驗魯坐停俸喬新亦許致仕喬新晚節益厲中外多論薦竟不復起十五年卒年七十六江西巡撫林俊爲請諡事竟寢正德十一年廣昌知縣張傑復以爲言乃贈太子太保予廕明年賜諡文肅

何永敬